

Siber, Urban Gottfried, 1669-1741

Canem e templis exterminandum iuxta leges eccles. ostendit Urb. Gottfr.
Sieber

Lipsia 1720

4 Diss. 407#Beibd.19

urn:nbn:de:bvb:12-bsb10651745-1

VD18 15119475-001

**CANEM^{21.}
E TEMPLIS EXTER-
MINANDUM
JUXTA LEGES ECCLESIASTICAS**

OSTENDIT

**URBANUS GODOFR. SIBERUS,
SACERDOS LIPS.**

LIPSIÆ

Sumptibus FRIDRICI LANCKISII.

TOTIUS DISSERTATIONIS COMPEN-
DIOSA ENARRATIO.



*Canis omnium animantium & laudatissimum, & vil-
lissimum. 2) Ob quasdam virtutes magni habetur. 3) Ob vitia multo plura ludibriis exponitur. 4)
& ad ignominiam aliis inferendam adhibetur, ne Sacro quidem ordine excluso, 5) exemplo obvio,
Canis in Sacrum Confessionis tribunal projecti, qua-
de re Speneri Consilium extat. 6.) Canis jure e templis profligatur, idque
Gentium, Græcorum, Turcarum consensu 7) neque tantum ob solam spur-
citiem, sed ob leges divinas, 8) quæ canem a censu focoque sacro
removerunt, quod contra Jo. Clericum asseritur. 9) Rationes Spen-
ceri de cane e Sacris Judæciis profligato non contemnenda, 10) ideo
quod Ægyptiî, e quibus Judei digressi, κυνολατρæ essent, 11) etsi sub
Cane, cœleste sydus venerarentur. 12) Nec tamen negandum Nu-
mini occultas nobis rationes fuisse. 13) Idem Canis contemptus in
Sacris novi Foederis permansit, 14) quia Christiani veteres Judæo-
rum puritatem imitabantur, nec ullus canem comitem habebat, præ-
ter Simonem Magum. 15) Unde non verosimile, ipsos in Proseucha
suos adduxisse canes, quia id persecutionis tempore periculosum. 16)
nec data pace illud esse factum, e remotione τῶν ἀλογευσαμένων colligitur.
17.) elaborabant enim Prasules, ut templa sua maximam Sanctitatis
opinionem haberent, 18) quo sine Consecrationes 19) & Reliquiæ
Martyrum inventæ, 20) Agapæ 21) emtiones & venditiones, 22)*

Clericorum Conjugatorum habitationes in templo 23) & Brutorum animantium quorumvis introductio in Concilio Trullano proscripta, cuius 24) Canon explicatur. 25) Unde etiam columba exulare iussa 26) & ipsi Canes Concilio Aquisgranensi proscripti, ne ara per τὴν ἐκκλῆσιαν profanarentur, qua occasione non nulla de flagellatione altarium & statuarum per Christianos irreligiose facta, tum de Campis Caninis referuntur, & Christianus Lupus Iprensis minus commodus Canonis Interpres notatur. 27) Rationes Patrum Aquisgranensium laudantur. 28) Hinc Sacerdotibus de canibus non alendis Leges date, quas tamen cum S. Ludgero, & Paulo II. Pontifice transgrediuntur, de cuius canino amore Campani carmen profertur. 29) Ratio profligandi canes a S. Cesario ostensa, non improbatur. Ostensio Crucis & magica proscriptio, qualem Constantinus apud Constantinopolitanos adhibuit rejicitur. Citatio & excommunicatio irridetur; 31) igitur medius ordinariis canum propulsio facta, nunquam vero per Diaconos 32) sed probabiliter per Ostiarios, de quorum officio ex libris ritualibus paucis agitur. 33) In nostris Ecclesiis per conductos Canum Lorarios, quorum desidia notatur. Praga Bohemorum per vetulas Ecclesie stipendiarias isto officio sine dedecore perfuncturas.



I.

INter omnia prope animantia vix ullum deprehendas, quod tantam vel laudis vel vituperii ignominiaeque materiam praebuerit, atque CANIS: quorum illud ex vigilantia, fidelitate, fortitudine, obsequio, adulatione, & veluti quodam rationis usu: alterum ex impudentia, inhospitalitate, salacitate, impuritate, sordibus, rabie factum fuisse, certo credi debet.

De Canibus Johannes Cajus Anglus libellum lectu dignum composuit, qui nuper Londini cum Thomae Johnsonii libello de Cura Canum, una cum Gratio & Nemesiano Fracastorii carmine pastoritio, quod inscribitur Alcon, editus est An. 1700. Ceterum quae ad Canum naturam pertinent accurate pariter, copioseque exhibet Samuel Bochartus Hieroz. T. I. p. 683. e quo unicum illud fidelitatis canine exemplum promo: Hodie Lutetia Parisiorum vivit canis, qui Domini in S. Innocent coemeterio sepulti tumulo jam per triennium incubuit nec ullis inde blanditiis abduci potuit. Quin a nonnullis vi abstractus & ad aliam partem urbis translatus ibique aliquandiu detentus, quam primum fuit sui juris, pristinam stationem repetiit, Domini cadaveri, ut videtur, tandem immoriturus, nisi obstet vis major. Res, anno quo haec scribo Chr. MDC LX. ideo visa mirabilior, quod in illo coemeterio per hyemales menses nix fuit altissima, & frigus intensissimum. Si de tam fidi Canis victu Lector est sollicitus, sciat locorum accolae rei novitate percussos huic abunde prospicere, pane & aqua ad tumulum, cui assidet, subinde missis. Huc usque Bochartus. Fortitudo Canum Hispanis contra Americanos explorata est, a quibus in aciem ducti, stipendioque dato ad praelium accensi fuere, teste Montaignio sic tradente pag. 432. on leur donnoit charges non d'un mouvement simple, mais de plusieurs diverses parties au combat: come faisoient aux chiens les Espagnols a la nouvelle conquestes des In-

des, auxquels ils payoient de soldes & faisoient partages au butin. Et monstroient ces animaux autant d'adresses & de jugement a poursuivre & arreter leur victoire, a charger ou a reculer selon les occasions a distinguer les amis des ennemis, comme ils faisoient d'ardeur, & d'asperite. Quo pertinet mirum Henrici VIII. Anglia Regis factum, Carolo V. Imperatori, cum quadringentis militibus CCCC. canes in auxilium adversus Gallia Regem mittentis, quod ex legati Anglici literis ad Polonia Regem refert Olaus Magni Hist. Septent. L. XVII. C. VII. & post eum Vossius de Idolol. L. III. c. 56.

Quod ad rationis umbram in canibus deprehensam pertinet, laudatus Montaignius Syllogismum canis, Cæcum ducentis sistit, a Chrysippo olim observatum, tantoque artificio compositum, quasi Canis Trapezontii Scholas Dialecticas frequentarit. Ce traint purement Dialecticien, & cet usages des propositions diverses & conjointes, & de la suffisante enumeration de parties, vaut il pas autant que le chien le sache de soy que le Trapezonce? si ne sont pas les bestes incapables d'estre encore instruites a nostre mode.

Inhospitalitatis argumentum mira ista ferocia prebet, quantum in equales bestias, tum ea, qua in homines sibi per familiaritatem nondum cognitos feruntur. Exemplum obvium in Insula, quæ a Ferdinando de Norogna nomen accepit, satis alias commoda, omnibusque bonis abundante, sed ideo tantum inhabitabili, quod Canes Angli, vel per incuriam vel invidiam olim in ea relictæ miraque fœcunditate aucti, omnes externos ab accessu arcent. Auctor Relationis de Inquisitione Goana Cap. 41. p. 112. inquit: elle est inhabitable depuis que quelques Anglois y ont laisse de Dogves expres, au par hazard; ces animaux ont si fort multipliée, & sont devenue si cruels, & si sauvages, qu'on n'y peut plus descendre; sans s'exposer au danger evident d'être dévoré.

II.

E virtutum consideratione pretium existimatioque tanto opere crevit, ut agmina eorum non vili tantum vulgo, sed regibus etiam

Principibusque cara forent, edictisque * propterea ac privilegiis defenderentur, quin ipsis etiam Sacerdotibus tanquam imitationis exemplar proponerentur.

* *Legi hac de re merentur Capitula Dagoberti, Francorum Regis, Alemannis data Cap. LXXXII. ubi sane mirandum, homini, qui canem invasorem trucidasset, jurisjurandi Religionem extortam esse, illam cædem non invidia, sed defensionis gratia perpetratam esse. Canem Sacerdotibus in exemplum sisti posse non sine sacra auctoritate dicimus: cui innitentes plurimi Patrum, istud simulacrum commendarunt. Nonnunquam etiam ipsum Numen igneam quorundam indolem sub Canis specie præfigurasse dicitur: quum Historici tradant Bernardi Clarevallensis matrem isto suo fœtu gravidam, per somnium canem album, rufo tergo notatum parere sibi visam fuisse. Cui somnio filius egregie respondit, omnium novaturientium tantus inimicus, ut quosdam etiam interque eos Abelardum, Gilbertum, Arnoldum Brixensem temere allatrasse putetur; qua de re Franciscus Amboisius in Præfat. Up. Abelardi legendus. Idem S. Dominici matri evenisse Sodales ejus contendunt, addito, Canem ardente facula ori indita, armatum apparuisse. Atque illo emblemate tantopere adhuc exultant, ut non solum in tropicis Inquisitionis Hispanica, teste Limborchio accurato illius enarratore, sed omnibus etiam Dominici monasteriis præfigatur. Sunt & inter Reformatos, quibus illud canis Simulacrum ad laudes suorum explicandas placuit: unde Coccejus placidissimo alias ingenio præditus Maccovio justa faciens ejus acerbitem isto symbolo veluti contexit. Sollicite tamen circumspiciendum, ne comparationes istas nimium extendamus, auditorumque animos, qui accendi debebant per Claudianam insipientiam in frigus conjiciamus: Id quod aliquando Ludovico Maimburgio in Collegio Claramontano Jesuitarum dicenti contigit: qui ad Pastoritium Davidis munus conversus, Canem illius mira fictione asseruit, Domino cum Goliatho decertante, Lupos interea consecratum esse: Inde ad comparationem Sacerdotum cum Canibus progressus, quatuor Canum genera prolixissime & frigidissime enarravit interque*

eos tandem Jesuitas esse prestantissimos maximo cum adstantium ludibrio professus est. Vid. Pref. de la Defense de la traduction du Nouveau Testament imprime a Mons contre les Sermons du Pere Maimbourg Jesuite. p. 6.

III.

Ex vitiorum obtutu contentus emerfit talis, ut abjectissimi quique mortalium, suppliciove destinati, vel projicerentur canibus vel canis gestatione omnium ludibrio * exponerentur, atque tum demum publica notati infamia crederentur, si caninae indolis aliquid ipsis inesse monstrari posset.

* *Mirabilis poena Alemannis a Dagoberto Rege imposita. si cujuscumque canis hominem occidisset, neque ille mulctam pro caso solvere vellet. Omnia ostia sua claudantur, & per unum ostium semper intret & exeat, & de illo limitare novem pedes suspendatur canis, usque dum totus putrescat, & ibi putridus cadat & ossa ipsius ibi jaceant: per alium ostium non intret, nec exeat: & si canem ipsum inde jactaverit, aut per alium ostium intraverit in casam, ipsum Weregildum medium reddat. Baluz. Capitul. Reg. Fr. T. I. p. 84. & 85.*

Militibus Domino suo fidem ex feudo debitam negantibus hanc olim poenam fuisse dictatam Arnoldus Lubec. Chron. Slav. L. VIII. Cap. II. docet, quingentos sistendo, qui de loco perpetrati sceleris usque ad fores majoris Ecclesiae Caniculum perferrent. Leibn. Scr. Brunsv. T. 3. p. 726.

Novum illud poenae genus foeminis adulterium committentibus dictavit Boleslaus Poloniae dux finiente seculo XI. nempe ut adempta prole, canum catulos suis uberibus lactarent, teste Cromero de Rebus Polon. L. IV. indignante propterea Papebrochio in vita S. Stanislai Episcopi Cracoviensis, quamvis factum illud laude non careat, sed rationi maxime sit conveniens, impudicas, promiscuo, caninoque coitu gaudentes, caninis ludibriis destinari.

IV.

Ex Foro civili consuetudo aliis per Canis gestationem illudendi in Ecclesiam transiit, unde eos, qui partium studiis scissione facta

ab aliis dissentirent, a rerum potentibus hac contumelia notatas legimus.

Augustinus Hipponensis L. 3. Cap. VI. contra Parmeniani Epistolam ostendit, Salvium Membresitanum Maximianistam, a Primitianistis hoc dedecore affectum, ut ejus cervici canum mortuorum cadavera colligarent, atque tanta ratione dedecoratum saltare cogerent. Quod quanta cum ignominia fuerit conjunctum ipse Augustinus effert: Thufcorum tyrannorum commemoratur antiqua crudelitas, qui mortua vivis, sed humana humanis corporibus conjungebant: canina vero humanis, & hæc episcopalibus membris, nescio utrum quisquam se vel legisse vel audisse unquam commemoret. Hujus ignominie memoria adeo Augustinum afficiebat, ut eandem denuo L. IV. contre Cresconium repeteret: Capto seni mortuos canes alligaverunt in collo, & sic cum illo quantum libuit saltaverunt. Hoc si vellem exaggerare dicendo, nonne fortasse, hanc pœnam vix tormentis Regum Etruscorum comparandam esse monstrarem. Nonne homo senex, si duobus sibi suppliciis, unde unum subeundum esset, propositis, non potius hareret cadaveribus humanis, quam saltare eligeret cum caninis? De Gothis certum est, eos ob Arianismum toleratum propagatumque ab Orthodoxis Canes Gothos appellatos esse, quod dictærum, lingua popularis, pernicipitati opitulatura, in Cagotos mutavit aut potius detruncavit. Vid. Sandii Nucl. Hist. Gal. p. 431. Paschasii Disquis. de Gallia L. 8. c. 2. & Petrus de Marca Hist. Bearnii L. 1 c. 16. ubi eos Agots appellat; quos Aubineus Hist. L. 2. c. 8. in Capots. s. Capotos. mutavit. Addatur Greg. Naz. Orat. XXVIII. qua Canes dicuntur, qui illicitis artibus ad Præsulatus prorepserant Non est prætereundum hoc loco Pontificiorum odia in Reformatæ Sectæ socios olim ita exarsisse, ut occisos, canibus ad devorandum projicerent, mox ipsos canes, quasi aliquid hæreticæ labis contraxissent, interficerent, cujus rei Exemplum Aubigneus Hist. Univers. L. XI Cap. 18. sequentibus profert: Le Sieur de Mouvans eût massacré à Dragvinan en Provence en haine de sa Religion & son cœur ayant été jetté aux chiens, en assomma en suite ces memes chiens, comme heretiques, parce qu'ils avoient fait difficulté d'en manger.

V.

Manfit ad nostram ætatem illud e Canis gestatione aut projectione dedecus, quod cum probo cuidam Sacerdoti Anno R. S. M DCCII. illatum esset, cane mortuo in Sellam Confessionalem coniecto, eaque propter novi tribunalis erectionem petenti, atque illuforem suum gravissimis diris devoventi, prudentissimus Theogorum * dignissimum lectu consilium, eaque propter latina lingua a nobis donatum suppeditavit.

* *Philipp. Jac. Spen. Consiliorum Epistolicorum Parte ult. p. 562.*

Facinus illud ignoti hominis, canem mortuum e fimo trahentis, ejusque cadavere sellam sacris Confessionibus destinatam contaminantis, maximis profecto sceleribus accenseri debet: idque tanto magis, quo minus exinde commodum in patratores redundat, nisi quod ea re vel damnabile odium, in doctorem suum, vel petulantiam insigni cum malitia conjunctam prodiderit: ut taceam de sacri loci profanatione, cui licet interna aut connata sanctitas tribui nequeat, veneratio tamen ob sacras actiones non deneganda erit: qua sublata profanus patratoris animus inque Numinis contemptum abreptus satis deprehenditur, magna profecto, insignique pœnitentia emendandus, si bujus noxæ veniam consequi voluerit.

Quod si facinus illud remoto cadavere, paucis consciis silentio regi potuisset, optime quidem honori publico consultum putassem: posteaquam vero illud ad omnium aures non sine magna animorum commotione perlatum fuit: merebatur utique indignitas rei, cujus cum increpatione publica mentio fieret, nempe ut ignotus ille Sacrorum contemptor ad Pœnitentiam, Ecclesiæ Cives, ad animi pariter tranquillitatem, atque eam sapientiam traducerentur, nihil exinde damni sacris ædibus illatum esse.

Quod si ego meas ibi partes agere debuisssem, hac sane occasione de publico & immuni Confessionis & Absolutionis abusu dixissem, deque damnabili pœnitentiæ simulatione, de furto, quo maxima pars divinam veluti gratiam surripit: quo qui scelere contaminati sunt, omnino faciunt, ut coram tribunali divino, non nisi

canes reputentur, parique scelere involvantur, quo miser ille sacrorum contemtor se contaminavit: quin imo tales putido cane, foediores dixissem, a sacris nempe abstinente, quum impii verbo Dei & reconciliationis, impiis haud quaquam dato, toties abutantur, quoties animo vitiis devoto & devovendo ad Exomologesin & Absolutionem accedunt. Unde non omnino erraverit is, qui existimaverit divina veluti quadam concessione scelus illud perpetratum esse, nempe ut sub facinoris foeditate impii de Confessionis & Absolutionis abusu admoniti, sub tristi exemplo, licet invisum, attamen verum suorum scelerum praconem haberent. Hac nempe ratione, etsi non omnes, attamen si pauci in se conversi, Absolutionem prudentius petere, canumque impudentiam missam facere didicissent, factum fortassis foret, ut juxta benignam Numinis providentiam, ex gravi scelere boni tamen aliquid prodisset, locoque scandali non levis animarum emendatio emerisset.

Jam cum illius Ecclesiae Inspector officii sui partes bene impleverit, quod graviter severeque de isto scandalo dixerit, objurgato patratore ceteros adhortans, ut si quis facti conscientiam haberet, indicium faceret: ita ne Diacono quidem, aequalem increpandi auctoritatem habenti, vitio vertendum, quod in idem scelus fuerit inductus, modo perpendisset, sibi, hoc ludibrio sigillatim petito, cautius loquendum, nempe ne in propria causa zelum divinum, ex privati odii instinctu quadammodo adulterasse videri possit. Sane jus illud increpandi illud flagitavit, ut gravitatem facinoris vivis sisteret coloribus, ignotumque peccatorem ad veram malefacti agnitionem deduceret, periculum animae monstraret, vindictaeque divinae hac ratione provocata, vicissimque avertende modos doceret, de commutatione Peccatoris in melius Deo supplex fieret, totamque Christianam Sodalitatem ad idem a Deo postulandum instigaret.

Verum quod ad execrationem e V. Mosis Codice petitam inque caput patratoris devolutam spectat, eam sane vix, ac ne vix quidem cuidam mortalium imprecari vellem: quin imo, altero quopiam id audente, inter abusus verbi divini referrem. Sex

enim tribus imperatum erat, ut in monte Ebal maledictiones illas in universum efferrent, unde sequitur, factum illud ad singuli cujusdam aut unius hominis execrationem institutum non esse, sed appendicem potius. Et partem publicae Legis, qua Levitae certis quibusdam noxis sigillatim nominatis Maledictionem divinam praedicebant, quam populus acclamatione sua solennique plausu ratam habebat.

Eadem ratione Maledictiones Cap. XXVIII. non nisi divinas poenas denunciant in immorigeros constitutas, quae maximam partem more foederis Mosaici, (etiamsi spirituales & aeternae poenae non prorsus excludantur) hujus vitae commodis adversae erant, eorumdemque privationem minabantur. Qua autem ratione ejusmodi poenae in peccatores e sacris nostris hodie pronunciari possint, non satis equidem mihi constat. Sive enim illud fiat per imprecationis modum, tum ea, misericordiam Peccatori debitam, precesque potius flagitantem evertet: Sin vero per nudam annunciationem, ea profecto incerta erit, ignaro nempe Sacerdote, quid divina sapientia in Peccatorem decreverit. Ex quo constat, Verbi Praeconem homini pertinacius aberranti divinam equidem iram, non vero poenas temporales a Moyse dictatas comminari posse: illam enim capiti peccatoris instare ac veluti impendere certo asserere potest, has autem, revelatione destitutus, peccatorem insecuturas certo affirmare nequit. Eaque propter illud Diaconi factum bono licet fine susceptum, minasque posteris, & fructui ventris intentatas non probo. Etsi enim oracula divina pandant, justitiam divinam, etiam posteros plectere parentumque noxas in stirpe vindicare posse ac velle: attamen dum eam veneramur, temeritatem nibiloscius cavemus, quominus poenas illas alicui tanquam omnino insistentes denunciemus.

Eadem ratione ductus traditionem Peccatoris in manus Satanae ad destructionem carnis improbo. Paulus equidem divino Spiritu instructus acerbam istam medicinam incestuoso ad veram animi conversionem salutarem fore praevicens, Apostolica potestate fretus, reum certis legibus Satanae tradebat. At quum nos ea

pote-

potestate destituamur, convenit nobis equidem, ut Deum de Peccatorum conversione, sed ea qua ipsi placet ratione, sollicitemus, ac viam tantopere duram prescribere, baud quaquam licet. Et si igitur in illa Prosphonesti ad Deum peccatum non sit, quum liceat ad publica scelera averruncanda querelas in sinum Dei effundere, eaque profiteri, & reis poenitentiae fructus apprecari: tales tamen allocutiones, qua tanquam dictatoriae Deo prescribunt nulla ratione sunt adhibenda.

Sin igitur, quod avertat Deus, tale quidpiam imposterum sit eventurum, e dictis hactenus constabit, quid faciendum, neque propterea novam sellam extruendam esse, priori licet sordibus quibusdam conspersa. Interea Deus nos de voluntate sua, deque salutis nostrae cura edoceat, inque munere nobis imposito fidos reddat, & omnibus tandem conatibus in honorem ipsius vergentibus per Christum benignissime aspiret. Scr. Mense Majo. Ao. MDCCII.

VI.

*Sed de ludibriis a Cane petitis alii dicent: nostrum est ostendere, animal istud e templo esse proturbandum, * nec committendum, ut quo loco Deus se peculiari ratione se praesentem exhibet, agnique ** immaculati sacra pertractantur, atque purissimae illius coelestisque columbae domicilium est, impurum animal tolleretur.*

** De cane e templis proscribendo multorum forte, praesertim vero gentilium suffragia aduersabuntur, quorum baud pauci Canes ad adium sacrarum custodiam adhibuerunt. Quin imo Christianis quibusdam de illa consuetudine adeo persuasum fuit, ut templorum a Canibus custoditorum a Moyse initium petiti velint. Petrus Daniel Huetius Demonstr. Evang. Prop. IV. ostensurus, qua ratione omnis Historia Moysis in fabulas sit detorta, postquam legisset a Vulcano aereum canem sed vivum fabrefactum fuisse, per Vulcanum contendit Moysen esse designatum, per Canem vero Calebem fidum Cananae terrae exploratorem: quod sequentibus verbis explicat: Canum custodia templis apposita originem trahere videtur a Calebo ad lustrandam terram Canaan cum aliis misso,*

Et officio grauiter ac fideliter functo, quem seruum suum ideo Deus agnoscit & appellat. Caleb autem Ebraice Canem sonat. Eandem ob causam fabulati sunt Veteres canem vivum ex are a Vulcano fabricatum, & ita ab arte comparatum, ut nulla eum oblata praeda refugeret. Hæc Huetius, cuius quum exquisitam eruditionem alias suspiciamus, merito tamen has argutias omni fundamento destitutas, inter luxuriantis & otio abutentis ingenii ineptias referimus. Quod si Calebus tabernaculi aut templi custodia fuisset impositus, aut utrumque istud vel sub Moyse vel sub Salomone a canibus custoditum foret, esset forte ratio, qua ipsi ad stipularemur: at quum nullum ejus rei vestigium extet, merito morem illum ad incertam originem referimus, hominibus quippe sua sponte edoctis, ut sua, qua possint sollicitudine tueantur. Emul-
 tis unicum illud, idemque splendidissimum Urbis Imperatricis templum non sine causa CL. Ryckio sigillatim descriptum liceat citare, quod teste Cicerone, non anserum modo, sed Canum quoque ita assue factorum cura demandatum fuit, ut nocte quidem, & quoad tenebra durarent vel ad levisimum strepitum omnia latratibus implerent: surgentibus vero Solis radiis, conticescerent, profundumque silentium vel cum Pythagora, vel si mavis cum ranis Sisyphiis seruarent. Etsi vero concedamus canes custodia templorum adhibitos, a paucis tamen intra templi septa admissos esse demonstrari potest: quin imo exempla sibi possunt, a profanorum quoque templis Canes fuisse proscriptos. De Deliorum non modo templis, sed omni insula Strabo luculentus est testis Libr XL & ἐξ ἐστὶν ἡ δὲ κυρία τρεφεῖν: quam Legem cum aliis eo spectantibus peculiaris puritatis gratia latam Thucydides confirmat. Roma Sacellum Herculi in foro Boario sacratum esse, e quo Canes exulent, Solinum auctorem habeo. Hoc sacellum, ait, Herculi in Foro Boario est, in quo argumenta convivii & majestatis remanent. Nam divinitus illo neque canibus, neque muscis ingressus est. Etenim cum viscerationem sacricolis daret Myiagrū Deum dicitur imprecatus, clavam vero in aditu reliquisse, cujus effectū refugerent Canes: idusque nunc durat. Quæ verba quum Maresius, Bata-
 vorum

vorum Theologus, satis bene commodeque citasset, nescio quid Baylius, Critico fastu plenus, adversus eum quasi minus recte Solinum percepisset, dixerit.

Ne vero solis gentium delubris illud tribuamus, de Christianorum aedificiis religione sacratis constat, ea nonnunquam ab omni Canum accessu diuinitus liberata esse; Id quod vetusti quidam Historiae Gallicae scriptores de Catulliaco, primo Reliquiarum S. Dionysii fano jactant; tradunt enim Dagoberto, Cblotarii Regis Filio, mira magnitudinis cervum persequente, eoque ad Dionysii adem velut ad aram confugiente, Canes venaticos quasi divina vi cohibitos ad fores templi constituisse, solo latratu officio functos sortem suam deplorasse, quod neque pedum nec dentium robore uti liceret, eoque miraculo Dagobertum commotum, ut ob praesentis ibi divinitatis opinionem, multo illustrius atque splendidius templum in Dionysii cultum exaedicaret. Vid. Andr. du Chesne Antiquit. & Recherches de France L. I. p. 252. Cointius Ann. Fr. A. X. 619. §. 14. qui tamen ingenue refert, Henricum Valesium tum aliis gravissimis rationibus inductum hanc fabulam profligasse, tum bis praeterea, quod Regino Prumiensis, Sigebertus Gemblacensis nullam hujus cervi mentionem faciant: quem tamen vicissim a Bollando in Dissertationibus Dagobertinis refutatum legimus.

Idem privilegium Graeci sub Saracenorum imperio degentes suis indultum templis gloriantur, quod Turca lepida ratione everunt dicendo, Canes, Graecis ad prostrationem corporum s. πρὸς τοῦ νοῦ ruentibus sibi imaginari, eosdem, lapides, Canum fulgura correpturos, eaque propter celeri sibi fuga consulere. Autorem hujus rei habemus Guilletum in Lacedaemone Vetere & Nova pag. 232. qui Turcarum Moschicas eodem beneficio frui tradit; putat tamen illam Canum prudentiam e consuetudine oriri; quum canes juniores fastidium Parentum suorum lapidibus inde abactorum videntes, eandem aversationem facile imitentur.

Jocundum sane lectu est, quod Montanus (du Mont) T. III. Itinerum suorum refert: Sacerdotem quendam Mahumetanum apud Smyrnenses Cani suo ideo iratum, quod sese, Turcas ad preces vocantem, miserabili ejulatu turbaret, cadem intulisse, sed venia-

prius a Præatore urbis Turcico impetrata. Du Mont. L. 3. p. 171. Oportebat Canem istum Turcicum ad celebre Monasterium Corbeienſemitti, quod teſte Paulino tam religioſum canem habuit, ut Miſſam Pontificiam diligenti & venerabili corporis habita audiret, ſtatos jejuniorum dies obſervaret, omnesque canes laceraret, qui ad templi muros mingere auderent. v. Miſſon Voy. de Italie T. 1. p. 26.

*** Agni nomine merito Servatorem noſtrum designamus, quippe quo Antefignanus illius Joannes delectatus, alterque Homonymus Evangelii Præco oblata ſibi per viſionem illius ſpecie recreatus eſt, etſi typus agni jam jam impletus eſſet. Unde nimie ſubtilitatis arguendi ſunt Concilii Trullani Patres, quando illam Chriſti per agnum delineationem expungi voluerunt, ideo quod poſt πληρωμα τῆς νομῆς τοῦ προσχαρῶμα ceſſare deberet. Vid. Conc. Trull. Can. LXXXII. ap. Bevereg. T. 1. p. 252.*

VII.

Hujus tamen deſiderii mei rationem non ex ſola Canum impuritate ſpurcitieque depromo: quandoquidem inter alia animantia terreſtria pariter ac volatilia reperiuntur, quæ vel ejecta reſorbent, vel in publico coeunt, vel ſtercore lavantur, & alias ſordium notas habent: ſed e Legibus inſtitutisque divinis, unde plane conſtat, hos utiles alias ædium, gregumque cuſtodes, a ſacris conventibus procul ablegandos. *

** Id mihi jam tum Phædrus Auguſti libertus præſignificaffe videtur, in elegantiffima quidem illa de Canum Legatione ad Jovem fabula, quam ob frequentiam libri, ſimulque ob inſperſas ſordes, indignam iſto loco judicamus, illud tamen exinde conſtituentes, magno ſacrorum contemptu fieri, ſi, quo maxime illa contaminantur, in eorundem conſpectum veniant. Vid. Phædr. Fab. XVI. vel LXXIV.*

VIII.

Quod ad Ebræorum ſacra pertinet, Moſes fidem facit, Cani, receptis licet aliis animantibus, nullum in cenſu focoque ſacro locum relictum eſſe. *Non offeres, ait, Canis pretium in Domo Domini Dei tui: (Deutr. 23, 18.)* quæ Legislatoris verba quum in ancipitem ſenſum

traherentur, atque Josephus Legum Ebraicarum non optimus undique Interpres aliis a mente Moysis abeundi auctor esset, Joannes Spencerus jure suo usus hos aliosque refellit, monstravitque, non Canis modo pretium, aut Canum imitatores, sed Canem ipsum a Deo respui, proque abominatione haberi.

*Voluerat Deus omnium animantium primogenita certo constituto pretio redimi, solo excepto Cane, idque ob rationes mysticas. Quod quum dudum inter Judæos sacra sua percolentes obtinuisset, Josephus aliam huic Legi Interpretationem dare visus, & nonnullis interque eos Hugoni & Marzille, Martinoque Roae a litera abeundi occasionem dedit. Verba Josephi ideo, quod Lorinus ea se non reperisse fateatur, adducimus: μηδ' αν επ' οχευται κυν & η τοι θηρευτικα η ποιμνιων φυλακος λαβοι τις μισθον, εκ τας τας θυειν τω θεω. Si quis mercedem pro admissura canis venatici aut pastoralis acceperit, ne inde quidem Deo sacrificare licitum. At ista Mosai-
corum verborum interpretatio difficilis admodum aliis ingenio judicioque pollentibus visa, ideo quod non verosimile appareat επ' οχευται κυν & pretium quoddam petere aut dare, ut de equis, bobus, bircis & aliis animantibus nonnunquam solet: vel si daretur pretium, illud adeo exile fuisse, ut vix aliqua pars inde Deo consecrari posset: tandem majestati divine parum decorum, ex fædo coitu animantium quandam sibi venerationis partem pacisci. Hinc alii Interpretes magis aptam explicandi viam ingressi dixerunt, sub Canis nomine apud Ebræos Cynicum, eumque vel Pædiconem, vel Pathicum intelligi, quod jam pridem e nostris Glasius, Theologus plane eruditus, & Fesselius, e Reformatis Tremellius & Pelargus, e Pontificiis Joannis Torres Hispanus, asseruere, quorum postremus opere erudito Hispanice de Philosophia morali scripto Libro XV. egregiam inter luxuriosum hominem & Canem comparationem instituit. Nuper vero Joannes Clericus, in Paraphrasi Deuteronomii, quasi jam de orbis suffragio certus foret, verba Moysis ita circumscripsit: Nulla meretrix inter Israelitidas, nullus Cincædus inter Adolescentes Israelitas, quasi Numini sacri, inter vos sunt. Quæstum quem corpore fecerint, ut vicini vestri solent, Deo consecratum*

cratum Sacerdotes ne accipiunt. Quam ut sententiam tanto magis stabiliret, ait primo: Pretium canis primogeniti statutum a Deo exactumque fuisse, idque probare contendit verbis Legislatoris Num. XVII. v. 15. Secundo: congruum esse, ut quum de communi fornicationis specie cum foeminis fuerit dictum, sanciatum etiam de stupro cum masculis perpetrato. Tertio: multas Moysis Leges esse symbolicas neque juxta literas interpretandas. Quarto: tales homines impuros more oraculorum divinorum Canes fuisse per execrationem dictos. Ne autem Clerico sine exploratione ad stipulemur, observamus, non modo parum certum, sed admodum falsum esse, Canem pretio fuisse redemptum neque ex verbis Mosais Num. XVII, 15. ob solam amplitudinem Legis statui posse, Canem inter animantia redimenda fuisse comprehensum, cui nempe altera illa exceptione Deuter. XXIII. satis consultum fuit. Præterea temerarium est dicere, omnium rerum, quarum quidem ἀπαρχα dari poterant, re ipsa primitias vel decimas fuisse exactas, quum verosimile sit, divinam Legem tantum ad res bonas, & præstantiores, vitæque humanæ conducibiles fuisse extensam, non ad vilissima quæque & περιφνητά, etiamsi aliquis inde fructus ab hominibus percipi potuisset. Ita si quis tribulos vel spinas adibus aut hortis circumvallandis aptas, collectas in fasciculos per decimationem Deo obtulisset, rem sane stultam facturus erat. Par ratione inter animantia viva, sicut ranarum oblatio, suo quodam modo utilem, fuisset inepta, sic etiam Canum: id quod constat ex illusione Pharisæorum, mentham, anethum & cuminum inter decimas offerentium, quos Servator inter τὰς διυλιζοντας τὰ κτώνηα pro sua sapientia retulit, quum τὰ βαρύτερα τὰ νομῶν missa faciunt: quos inter Clericus referendus, tum Canem animantibus pretio redimendum contra Legislatoris voluntatem accessit.

Quod ad secundum Clerici munimentum spectat, post stupri foeminei prohibitionem de masculi sexus foeda illusione dicendum fuisse: fatemur istud egregiam quidem speciem præ se ferre, nec tamen omnino stare posse. Moses sane non tenebatur, ut hoc loco de isto scelere ageret, atque nuptis in id, intellēctūque ambiguū in-
deberet

veheret verbis, de quo Levit. XX. v. 12. apertis, dirorumque suppliciorum minas continentibus satis dixerat. Accedit, quod si hac occasione de pretio Canis, seu lucro pederastiae in templum non inferendo egisset, videri potuisset, ipsum probare aut concedere scelus extra templum, etsi reditus inde Deo oblatos spreverit. Quum enim negari non possit, siorta meritoria inter Iudaeos in vicio licet Deo tolerata fuisse sequeretur, ludibria illa sexus potioris pari ratione per conniventiam fuisse concedenda, etiamsi decimae inde non reciperentur; quod quam impium absurdumque sit dicere, quivis videt.

Tertium Clerici pondus, multas Moysis Leges fuisse symbolicas, etsi non plane aspernemur, ita tamen temperari debet, ut nihilominus fateamur, omnes durante cultu Mosaico ad verbum fuisse praestandas non exclusa licet interpretatione mystica. Unde etsi facile largiamur, sub ista Lege Canes ratione praeditos, & homines Cynicos notari potuisse, hoc tamen ante omnia statuendum, eam Legem primario ad Canem latrantem, & ut apertius loquar, naturalem respexisse.

Quarto non inficias imus, homines impuros Canum cognomento fuisse notatos, illud tamen omnino negamus, solos tales hoc nomine venisse. Oracula profecto divina satis ostendunt, torvis, ferocibus, & ab humanitate alienis illud impositum fuisse nomen. v. Ps. XXII. aliquando vero etiam abjectis datum, assumtumve, ut Hasaëli, qui per nimiam animi depressionem Canem sese dicebat, II. Reg. VII. quo loco nemo sanus putaverit, Davidem inter cynædos versatum, aut Hasaëlem ea se infamia aspergere voluisse. Quinimo certum est, probis aliquando hominibus ob expectatam virtutem honoris ergo nomen illud fuisse inditum, ut Calebo: quo literarum sono sin sola Pederastia, execrabile scelus, describeretur, Parentes sane rem pessimi ominis commisissent, quum tam fœdum filio suo, ad tantam virtutem excrecenti, nomen imponerent; nec splendida illa Scaligerorum gens passura fuerat, ullum nominis sui Civem Canis Epitheto insigniri: nec celebris illa Dandulorum, apud Venetos familia tulisset Franciscum Dandulum ita cognomi-

nari, quum Reipublicæ gratia catena ferrea collo vinctus, quadrupesque effectus, ad Clementis V. Pontif. R. cœnitantis pedes sese prostravisset. Vid. J. Bapt. Egn. LVI. c. II. Illustr. Venet. & ex eo Andr. Victorel. T. II. Ciac. p. 363.

Hinc itaque fit, ut Bocharto potius ad stipulemur, Legem de proijciendo Canis pretio ad verbum interpretanti, beneque admodum huius facti rationem reddenti, quod Legislatores Tropis & Metaphoris uti non soleant, sed edicta sua verbis propriis efferant, ne ulla subsit equivocatio. Bochart. Hieroz. P. I. L. 2. c. 56. Tanto autem id libentius facimus, quod Spencero Bocharti sententiam placuisse videamus. Ad stipulatur nobis Guilelmus Saldenus Theolog. Or. Theol. Exerc. VII. de Pretio Canis inscripta, in quam omnia quidem, quæ de canibus a Rhodiginis Camerariisque dicta sunt, studiose collegit. Ceterum quando putat etiam pro felibus αἰγῶν δῶμα datum fuisse Sect. XIV, id quidem firmioribus rationibus adstruere debebat, antequam illius pretii receptionem tanquam admiratione dignam sisteret.

IX.

Quod si asserti huius ratio petatur, non errasse putandus est Spencerus, L. II. c. 23. Sect. 2. p. 662. seqq. dum ait, DEum inter Ebræos Ægyptiosque hac etiam Lege discrimen facere voluisse, ideo quod Ægyptii suos intra Deos Canes haberent. Id quod neutiquam ex ingenio finxit, sed certis documentis e Diodoro Siculo Bibl. Hist. L. I. petitis, quibus omnium antiquitatum Varro, Plutarchus ad stipulatur, in erudito de Iside & Osiride tractatu docens, Canem non honores solum sed & eosdem maximos apud Ægyptios obtinuisse. Quo loco non negligendum putamus Strabonem Geogr. L. 17. accuratum orbis rituumque humanorum explarorem, qui & ipse integram præfecturam Cynopolitanam Canis & Anubis cultu celebrem nobis sistit: multo minus Eusebium Cæsariensem, qui in Commentariis ad Esaiam nuper a Bernardo de Montfaucon editis docet, Ægyptiis usitatum fuisse, ut oppidis suis ab animantibus penes se Deorum loco cultis nomina darent, unde a Leone, Leonto, & a cane Cyno nomen acceperit. Vid. Coll. Nov. Patr. T. 2. p. 475. Etsi vero eos Juvenalis Sardonio risu sivetisque cachi-

cachinnis excipiat, nihilominus tamen certum, moriente quodam ex his Diis Caninis Ægyptios raso universo corpore in maximum fletum conversos non aliud luctus sui remedium nisi in splendidissimis Canum exequiis quæsiuisse Herod. Euterp. c. 67.

X.

Gravissimis hisce Scriptoribus fidem addunt Nummi canina horum Deorum facie signati, quorum sufficientem copiam illustrissimi Nummorum Interpretes exhibent. De Anube illud adeo certum, ut Lucianus Samosatenus eundem more suo *κυνοπροσωπον* seu canivultium scitissima fictione appellaverit. Æsculapium addo, qui juxta Phœnicum linguam Deum Caninum notat, quo factum, ut apud Romanos in Insula Tiberina hoc potissimum sodalitio co-leretur.

XI.

Quæ cum ita sint, putari tamen non debet Ægyptiorum magos, adeo fuisse stolidos, ut Canem suo merito venerarentur, sed existimandum potius, arcanam hujus cultus causam extitisse: quam Ælianus (Hist. L. X. c. 45.) pandit, asserendo Canem Ægyptiis ideo sacrum, quod Astro cognomine oriente Nilus foecunditatis parens excrescat, pingvedineque sua omnem campum ad fertilitatem provocet.

XII.

Et hæc quidem rationes si ex humano captu negotium ponderes, non inanes erant, quo minus Legislatorem ad triste exilium canibus indicendum propellerent; at quum recordemur, Bovem ab Ægyptiis divino cultu circumdatum fuisse, neque tamen e sacrificiis Ebraicis projectum, licet ex eo divinare, alias Numini extitisse causas, ob quas ab omni sacrorum aditu Canis arceretur.

XIII.

Eundem Canis contemptum in sacris novi foederis mansisse, figuratæ Servatoris dictiones declarant; neque sanctum canibus, nec margaritas porcis objiciendas, ut taceam Pauli itidemque Joannis testimonia, quorum ille impuros ad vomitum redeunt, hic vero desperatos & ab omni spe salutis alienos ista sub imagine stitit.

XIV.

Jam quum plerique Christianorum conventus in templo Synagogisque celebrarentur, locis puritati quam maxime sacratis, quis crederet impuro animali totque divinis oraculis proscisso ullum aditum patuisse: quin imo putandum, illam Canis profligationem tanto magis valuisse, quanto fortius Christiani Judaicis ceremoniis tum temporis adhuc adhærent.

Merito mireris neminem Apostolorum aut antiquorum Christianorum sic describi, ut Canem comitem haberent, quum tamen baculorum, calceorum, palliorum, vidulorum, marsupiorum, gladiatorum, asinorum, boum, viperarum mentio fiat. Soli Simoni Mago Petri Apostoli obtreſtatori canis additur, isque magicus, maloque genio plenus, ideo quod Petrum fuerit allocutus: aut commentitius, & inter nugas referendus. Vid. Mich. Glyc. Annal. p. II. ed. Lab. p. 235. Ita namque vir summus Gerb. Job. Voss. de Idol. III. c. 44. existimat, omnes illas equorum, boum, picorum, columbarum locutiones ad Lingue humane equalitatem editas, aut fraudi Diabolice, aut Poetarum fictionibus adscribendas. Quod prudentissimum effatum amplector, nec temere arbitror hunc Simonis canem inter figmenta humani ingenii reponendum, quod nunquam cessat incredibilia excogitare; exemplo in Cornelio Agrippa obvio cui Diabolus sub canis specie assedisse cum magna pariter invidia & stoliditate a Paulo Jovio, & Theveto. Hist. Hom. Illustr. fingitur, dignus, sane cujus fama Wierus, Naudæus aliique suppetias ferrent.

XV.

Ecquis vero putet, Christianos, cum fervente persecutionum æstulatebras quærent, & occultissima ratione vel noctis conticinio vel antelucano tempore convenirent, invisas istas, silentioque tantopere inimicas umbras secum traxisse: quum facillimum foret, canum latratu prodi, eorumque in se vertere dentes qui Cybiraticis illis exploratoribus, Verri tantopere caris, & Ciceroni sub Canum appellatione notatis, multo peiores erant, quorumque instinctu canibus in ferali pegmate a Nerone constructo exponebantur.

* *Ferale illud pegma seu pontem, in quo Christiani Martyres sacris animantibus, leonibus ursis, apris, canibus subligabantur, eleganter exhibuit Gisbertus Cuperus Notis ad Lactantii de Mortibus Persecutorum Cap. XXI.*

XVI.

Data per Constantinum M. quiete, verosimile est, Christianos jocundam quæsiuisse pacem, & ut reliquæ munditiei sectatores erant, ita etiam cavisse, ne impudentes bestia turpissimum spectaculum vel coitu vel mictione, vel latratu aut aliis ludibriis edituræ, pias orantium psallentiumque meditationes turbarent. Quod ex accurato Ecclesias accedentium ordine, colligi potest, quos inter οἱ χειμαζόμενοι vel αλογευσταμένοι (ita Canone XVI Concilii Ancyranī dicuntur, qui cum bestiis coeunt, miserrima & execrabilis hominum fax, jure meritoque flammis adjudicata. De quibus Bevereg. T. 2. ad. Pand. Canonum p. 178.) extra Ecclesiam stare jubebantur, ideo quod scelera, brutorum fœdas libidines æquantia commisissent; ex quo judicamus, cani impudentissimo animali tanto minus adiutum fuisse concessum.

XVII.

Atque in eo elaborabant Præsules Christiani, ut templa sua non minus sancta haberentur, atque ea quæ gentium idolis quondam consecrata fuissent. Unde non nisi cum veneratione de iisdem locuti, augustum aliquid ipsis absente præsentique cœtu adesse crediderunt, nec ullam fere eorundem fecere mentionem, quin ea αἰδουσιμα τιμης καὶ σεβασματὸς ἀξία prædicarent. Vid. Bals. ad Canon. LXXX. Conc. in Trullo habiti.

XVIII.

Hanc sanctitatem ut eo firmitus rudioribus persvaderent, insigne quoddam fulcrum per consecrationes solennes adhibuerunt, e qua ceremoniarum multitudine, & obscuritate plebs facile inducebatur, ut re ipsa cœlitus concedi crederet, quod datum sibi peroptabant. Vid. Blast. ap. Bevereg. T. 2. p. 118.

XIX.

§. XIX.

Sanctorum quoque Martyrum cineres illati fuere, qui veluti Domnædios agerent, sui que memoria homines turpe aliquod commissuros percellerent atque, a pessimo instituto revocarent, vid. Can. Conc. VII. Oecum: apud Bevereg. T. I. p. 296.

§. XX.

Jam equidem agapæ in ipsa templorum navi celebrabantur, at quum in iisdem liberius nonnulli viverent, unde a severioribus morum magistris Cacabarii dicebantur: Tertull. de Jej. Cap. XVII. contingeretque, vel oris vel etiam ventris rejectamenta non procul a Sanctorum reliquiis deponi, constitutum ut ad servandam templorum sanctitatem agapæ, jam vetustioribus Patribus displicentes, plane abolerentur. *

* *Concilium Quinisextum Can. LXXIV. Non oportet in Dominicis locis eas, quæ dicuntur Agapæ, id est, caritates facere & intus in ade comedere, & accubitus sternere. Qui autem hoc ausi fuerint vel cessent, vel segregentur. Fatetur Christianus Lupus Iprens. Comment. ad eundem Can. P. II. p. 1008. istas Agapas adolescentium ac Juvenum fornicationibus sæpe fuisse foedatas, ideoque tanquam non bonum & sanctum ritum fuisse eliminandum.*

§. XXI.

Pari ratione quum sacrarum ædium venerationi aliquid decessisset emtione & venditione rerum edibilium, mox solenni Christianorum suffragio sancitum fuit, anathemate percellendum, si quis ενδον της εκκλησιας περιβολων, rerum venalium quidpiam exposuisset. Bevereg. T. 2. p. 120. Blastar. T. 2. p. 18. & T. I. p. 243.

§. XXII.

Præterea quum in vastioribus templis Clericorum habitationes essent, atque illi eo tempore mulieres secum haberent: mox istam habitationem εν τοις περι την εκκλησιαν ιεροις vetusti Patres tolerare noluerunt, ratione obvia, ne ex liberiore mulierum contrestatione

statione templorum sanctitas contaminaretur. At cum hominibus in templo edere, & alias nature actiones alibi non damnabiles, edere interdictum esset, facilis diuination, multo maiore severitate bruta inde profligata esse.

XXIII.

Et ista quidem per diuinationem atque conjecturam satis probabilem dicuntur, quum mundities primorum Christianorum, Judæorum singularitati admodum vicina non aliud suadeat. Verum si ad Seculum VII. abeatur, tum vero maiora sese documenta offerent, unde constet Canes e templo esse profligatos. Id quod apparebit, si viderimus alia animantia pura, aut a canibus parum differentia, procul ab Ecclesia fuisse remota.

Concilium Constantinopoli in Trullo imperante Justiniano II. habitum de non introducendis in Ecclesiam quibusvis belluis, sequentem in modum tradit: Can. LXXXVIII. μηδεις ενδον τς ιερς νας κτηνος το οιον εν εισαγαγετω, εκτος ει μη τις οδοιπορων μεγαλης καταλαβης αναγκης οικισκς κη καταγωγης απορων εν τω τοικτω καταλυση ναω. δια γαρ τς μη το κτηνος ενδον εισενεχθηναι, αυτο μεν εστιν οτε διαφθαρησεται: ο δε τη τς υποζυγισ αποβολη κη το εντευθεν απορως εχειν της επι την οδοιποριαν ορμης θανατς κινδυνω παραδοθησεται. Το γαρ σαββατον δια τον ανθρωπον γενεσθαι εκδιδασκομεθα: ως δια παντων προτιμητεαν ηγεισθαι την τς ανθρωπς σωτηριαν τε, κη ευπαθειαν. ει δε τις φωραθειη χωρις αναγκης, ως ειρηται, κτηνος εισαγειν εν τω ιερω, ει μεν κληρικος ειη, καταιρεσθω: ει δε λαικος, αφοριζεσθω. Nemo infra sacras edes quodvis jumentum inducat: nisi forte viator quispiam maxime urgente necessitate domuncula vel diversorio indigens in id templum diverterit. Nisi enim jumentum introductum fuerit, ipsum quidem nonnunquam interibit: hic vero propter jumentum amissionem, & facultatis ad iter peragendum ex eo profectam inopiam mortis periculo subjacebit. Si quis autem deprehensus fuerit sine necessitate jumentum in templum introducere, si sit quidem Clericus, deponatur, sin vero Laicus, segregetur. Huc usque Canonis verba, quæ accurate observavit Joannes Chrysostomus, qui licet ad templum usque equo veberetur, illum tamen ad vestibulum stare jubebat, προ της πυλης κελευσας σηναι, v. Pallad. ed. Paris. p. 902.

XXIV.

Sed meretur Canon qui accuratius inspiciatur, quo nempe ex ista animantium puriorum prohibitione tanto validius canum perturbationem asseramus.

Patres igitur e templo faceffere jubent κτηνῶ τοιοῦτον, quodvis jumentum, sub quo nomine pecus præcipue arcuatum comprehenditur. Unde Balsamon majorum mentem egregie perscrutatus sub vocabulo κτηνῶ, ἵππους καὶ τὰ υποζύγια, adstipulante Zonara, designat. Causas exclusionis addit, ἵνα - μη τὸ ἅγιον διὰ τῶν ἐκκρίσεων βεβηλωθῇ: ne sanctum per excrementa prophanetur. Deinde vero Patres quadantenus permittunt jumenta templis induci, nec tamen promiscue, sed ἐν ἀνάγκῃ μεγίστῃ, ἐν ἀπορίᾳ καταγωγῆς. ἐν κινδύνῳ θανάτου, tum homini tum animali impendentis: præter necessitatem vero id neutiquam fieri voluerunt. Quod ita Balsamon explicat, si metuenda sit sub dio pernoctantibus υπερβολικὴ καταψυξις, aut instet θάνατοφορὸς κακωσις. Neque tamen id concedi vult promiscue, addita ratione, quod non deceat κοινοποιεῖν καὶ βεβηλῆν τὸν ἅγιον ναὸν τὰ θεῶ.

Ex hac severa Patrum disciplina judicare licet, quantum a vetusto more discedant equestris aut consularis quandoque ordinis homines, dum exuvias suas equis curru junctis in ipsum templum per ambitionem devehī curant, quasi non sufficeret, homines tanto honoratiores, lecticam subire, lacrymasque fundere, nisi etiam bruta animantia suas cum iisdem sordes commisceant.

XXV.

Itaque quum Lex scripta esset de jumentis quibuscunque in Ecclesiam non admittendis: ex ea sequiores bona argumentandi ratione statuerunt, ne volucres quidem, perdices scilicet, columbas & passerēs esse in Ecclesiam admittendas. Ita namque Balsamon citatum Concilii Trullani Canonem interpretatus quærit: Quid vero alas volucres, an quis citra ullam distinctionem in templum introducet? respondet: ἔδε ταῦτα: nempe ne sanctum excrementis prophanetur. Etenim invaluerat iam consuetudo columbas aliasque minores aves per Ecclesiam dimittendi, quod potissimum tempore Pentecostali fieri solebat, testibus Joanne Abrincensi, & Ri-

qualibus Sylvaneſtenſi & Turonenſi ab Edmundo Martene Libro de antiqua Eccleſiæ diſciplina Cap. XXXVIII. adductis. Sed quod Eccleſia Occidentalis probabat, illud improbabat Orientalis, unde Baſamon νομιζω οτι κακως παιδουν οι επ εκκλησιαν περιτρεφας απολυοντες αντι πνευματ & αγιας επιδημιας. Cui Martenius adverſum tenet morem laudando, & ad plebis inſtructionem augendamque devotionem referendo: conatu admodum inani, quum nullum plane ex puerili luſu commodum, multo autem potius illa Baſamoni ſuſpecta εκκροισις, & ſacrorum conſpurcatio expectanda eſſet.

Prodiit nuper apud Helmeſtadienſes erudita & curioſa de columbis in Eccleſia Græca & Latina uſitatis moderante illuſtri & ſumme Reverendo Abbate G. Andr. Smidio Diſſertatio, cui in grata mentis teſſeram hanc noſtram ſymbolam addimus.

XXVI.

Tandem Cani Eccleſiarum impudentiſſimo profanatori dies dicta eſt in Concilio Aquisgranenſi Anno Servatoris DCC LXXXIX. habito, ſolenniſſimæ patrum ſuffragio e templo proſtigatus fuit. Verba Canonis hæc ſunt: *Placuit admonere reverentiam veſtram, ut unusquisque veſtrum videat, per ſuam parochiam, ut Eccleſia Dei ſuum habeat honorem ſimul & altaria ſecundum dignitatem ſuam venerentur, & non ſit domus Dei & Altaria ſacrata pervia canibus.* Obſervare licet duo potiffimum imperari: altarium venerationem: Canum proſcriptionem. Templum nempe eo tempore aperta, aut talibus januis munita erant, quæ ab unoquoque accedentium facile aperiri poſſent, ſi quis præter ſtatas orandi vices ea adire votaſque ac preces concipere vellet. At mira illius temporis tum & ſequiorum ſeculorum homines vindicta occuparat, ut ſi minus voti ſui compotes fierent, corripere Chriſti aliorumque ſanctorum ſtaſas eaſque ſpinis in poenæ vicem cingerent, aras vero etiam irreligioſo modo flagellarent. Quod ideo adducendum ducimus, quod accuratus alias ararum deſcriptor Vogtius iſtum morem non plene adduxerit. Nos eum ex Mabillonii Præfatione ad ſecul. II. Bened. Sectione XLVIII. ipſius verbis proferemus: Si quid furti in Oratoriis, in quibus ſanctorum reliquiæ continebantur, accidiffet, ſolebant antiqui ſanctos ipſos ad rei amiſſæ reſtitutionem non tam

Oratione, quam pia violentia adigere. Alii id præstabant *altarium nudatione*, ut S. Fructuosus Bracarenſis Episcopus, qui ob prædia Monasterio suo ablata sancta nudavit altaria, & ciliciis induit ea. Alii Luminum extinctione, ut Christianus, ædituus Floriacensis qui ob agrum; Ecclesiæ subtractum mane facto accedit ad Lychnos qui de camera Ecclesiæ dependebant, extendensque virgam quam tenebat, effregit cunctos. v. Greg. Tur. de Glor. Mart. cap. LXXIX. Alii reliquias sanctorum vel sanctorum imagines in terram aut in spinas deponebant. v. Chronographus Senonensis L.V. c.VII. Quum Dominus de Salmis res Ecclesiæ Senonensis diriperet, Monachi consilio Gilonis Episcopi Tullensis, imagines redemptoris nostri & etiam beatissimi Simeonis Confessoris de locis suis ad terram super spinas deposuerunt. Denique S. Eligius instar comminantis ad S. Columbam, cui Oratorium construxerat, sic Orationem direxisse legitur: L. 2. Vit. C. XXX. Nisi cito ornamenta tabernaculi hujus furata reduxeris, equidem spinis allatis faciam hanc januam ita obferari, ut nunquam tibi in hoc loco veneratio præbeatur ab hodie. Ita Mauricius Rotomagensis Episcopus ob occupata bona Ecclesiæ præcepit omnes & singulas B. Virginis & Christi Domini imagines in tota dioecesi sua super cathedram aut sellam aliquam deponi spinisque circumdari, qua de re ejus extat epistola in Spicilegio Dache-
riano T. 2. p. 521.

Huc usque Mabillonius, Sec. III. p. II. p. 104. Nos e propria lectione quædam ejusmodi profanationis altarium exempla promimus: In vita Germani Episcopi Parisiensis legitur, quosdam colonos e vico Corboilo ad Ecclesiam ejus accessisse, altare spoliantes verberasse. In vita Benedicti a Tortario scripta, mulier quædam in territorio Portiano ad aram accedit, sublatisque quibus operiebatur linteis altare diutissime flagris cecidit, increpans quasi præsentem Patrem Benedictum his verbis: Benedicte vetustissime, piger, letargice, quid agis? ut quid dormitas? quid tuos tantis subjacere servos improperiis sinis? Ad quæ verba Mabillonius, qui antea irreverentiam, *Piam violentiam* dixerat, sui oblitus exclamat: Hæccine est religio? sed sic ferebant illa tempora. Mabill. p. II. p. 393. Jam ut Patres Aquisgranenses malo suo tempore jam gliscenti obvi-

obviam irent, primo quidem de reverentia altarium sanxerunt, idque tanto magis, quod viderent istam flagellationem non nisi e Gentibus Idola sua quarumvis contumeliarum genere aspergentibus ortum traxisse. Quos tandem Gregorius X. imitatus, in Lugdunensi Concilio Generali, Decret. VI. de Off. Ord. c. si Canon: quum nondum exaruisse impium morem cerneret, reprobatum detestabilem abusum horrendæ indevotionis eorum, qui, Crucis, B. Virg. Mariæ, aliorumque sanctorum imagines irreverenti ausu tractantes eas in aggravationem cessationis prosternunt in terram, & urticis spinisque supponunt. Altera Canonis Aquisgranensis pars Canibus exilium bene admodum imponebat: nam ex prioribus illis Patrum sanctionibus satis edocti erant, templa in Campos Caninos, quales inter Rhætiæ & agrum Mediolanensem Ammianus Marcellinus L.V. & Apollinaris Sidonius Carm.V. v. 177. & Gregorius Hist. Fr. l. X. c. 3. deprehenderunt, neutiquam convertenda esse. Non placet in hujus Canonis explicatione *Christianus Lupus Turenensis*, quamvis in Canonibus enodandis dictaturam sibi quodammodo vindicet, ita enim colligit: *Si canibus accessus denegatur, tanto minus jumentis*; magno sane errore neglectuque Patrum Aquisgranensium: qui cum viderent a majoribus ne jumentis quidem aditum ad templa concessum esse, tanto minus eundem canibus concedendum statuerunt, quippe qui jumentis multo salaciores impurioreque essent. Unde invertenda potius ejus sententia: Si jumentis olim accessus denegatus, tanto minus canibus aditus patebit.

XXVII.

Jam si rationes petantur, quibus Patres illi ad eam Legem processerint, haudquaquam erraverim dicendo impuritatem, & maximam illam omnia conspurcandi libidinem in hoc animali ipsis ante oculos versatam. At enim vero, majores nostri adeo casti fuere, ut ne hominum quidem sordes in exteriori templi ambitu tolerarent. Unde Theodosius Augustus in Lege Asyli Ecclesiastici confirmatoria: Dei templum, ait, humana naturalique necessitate foedari, & sacrosancta mysteria infami infirmitate misceri, ac divina a profanis contaminari, sacra denique a profanis inquinari haud

parimur. Refertque præterea Theodoretus H.E. l.3. c.2. quendam Juliani Apostatæ servum ad altaria mingere ausum divino supplicio mox prostratum: Chrysostomus Maximinianum ob fœdum calicis sacri ludibrium, vermium corrosioni coelitus destinatum: Flodoardus quendam servum ob idem templo illatum dedecus terribili spectaculo deterritum: ut alia taceam quibus ejusmodi fordes templo parum aptas esse Numen declaravit. Neque tamen negari potest, Patres ad fœdam canum libidinem respexisse, quam impune procacissimis subsessionibus exercent, nec raro immundarum cogitationum adultis æque atque tenerioribus fomitem præbent: quo sæpe factum, ut miseri nonnulli ex utroque sexu ad fœdum libidinis cum iisdem animantibus experimentum sollicitarentur, teste epistola Rabani Abbatis Fuldenfis ad Reginboldum, Chorepiscopum Moguntinum, a Baluzio Appendici Capitularium indita T. II. p. 1378.

XXVIII.

Quantopere autem hanc Legem observari vellent, iis præterea sanctionibus declararunt, quibus Sacerdotali ordini, ne canes aleret, penitus interdictum fuit; vix enim evitari posse putabant, quin canes sacerdotibus familiares, ipsis ad sacra prodeuntibus, simul irreperent, sacrasque inde actiones varia ratione conturbarent. Extat Concilii Matisconensis Ao. D LXXXV. habiti Canon XIII. Volumus quod episcopalis domus, quæ ad hoc Deo favente instituta est, ut sine personarum acceptione omnes in hospitalitate recipiat, Canes non habeat. Custodienda est episcopalis habitatio hymnis, non latratibus, operibus bonis, non morsibus venenosis. Ubi igitur Dei est assiduitas cantilenæ, monstrum est, & dedecoris nota, canes ibi vel accipitres habitare. Transmitto ceteras Conciliorum Sanctiones, e Matisconensi haustas, nempe Conc. Svesf. Capit. III. Wormatiensis Anno DCCCLXVIII. Canon XVII. & Bituricensis Can. LXIV. Id silentio involvi nequit, Episcopos vel ob solos cum cane lusus habitos a Præfulatu remotos esse. Exemplum extat apud Othlonum Monachum Benedictinum in vita S. Bonifacii ad Monachos Fuldenses scripta Lib. I. cap. XXXVIII. Sec. III. Bened. P. II. p. 52. de Gewiliebo, Episcopo Moguntino, cujus nomen Germanicum donandi promptitudinem significans. Lohheus mira contorsione in Ger-

vilionem mutavit. Is postquam a Bonifacio de homicidio accusatus esset, neque illud inter crimina recipi vellet, ideo quod iusta de causa, iustoque bello, cui Episcopus tum interesse moris erat, perpetratum foret, *ad hac ei objecit, propriis oculis se perspexisse, illum cum avibus canibusque jocantem, quod Episcopo nullatenus liceret.* Quæ audiens Gewilieb, sentiensque se nullo modo contra stimulum calcitrare posse, iudicio consentit communi, depositusque est ab ordine episcopali. Quo deposito statim Bonifacius Ecclesiæ Moguntinæ præficitur. Hæc Othlomus mirante Mabillonio, notamque margini addente, idque merito, cum deinceps maximi quique Abbates & Pontifices, canes tum inter vates suos, tum delicias retulerint. Sic enim tradunt S. Ludgerum canis sui potissimum ductu Helmeftadium condidisse, quæ historia picturis fenestrarum indita fuit, quum ea de re taceant ceteri Ludgeriani præcones, & Helmeftadium longe ante Ludgerum extitisse contendant. Delicias vero Pontificum e canibus perceptas Jo. Antonius Campanus Carminum L. VIII. exhibet, quo Pauli II. Pontif. Romani Catellam Zacharinam sequentibus describit:

Zacharina mihi nomen fuit, alba catella,
 Credebam Scythicam vincere posse nivem.
 Pontificis Pauli rectis nutrita secundi,
 Digna cibo sacro, digna sacris ædibus.
 Hujus ego curas cauda, gestuque levabam,
 Lætitiæ pedibus, auribus, ore ferens.
 Occubui senio, nec me servare cadentem
 Christophori medicæ prævalere manus.
 Ille mihi quicquid potuit modo, præstitit, at me
 Absumpsit, fato plus operante, dies.
 Cetera concurrunt medicamina: tempus & anni
 Fomentum nullis artibus accipiunt.

Meretur illud Campani carmen quod studiose legatur, quum arcana illa & interior Pontificum vita & ipsius potissimum Pauli II. quam Platina multo rectius ac Massonius descripsit, non parum explanari possit. Hic enim unicum illud virtutis Paulinæ documentum refert, quod fuerit Venetus & senex, quasi non inter Venetos minus

prudentes, & inter Senes deliri esse queant. Certe ex hoc Campani carmine constat, Paulum II. antiquos Patrum Canones de non alendis Canibus conculcasse, & Zacharinam sacro cibo, sacrisque ædibus dignam habuisse. Deinde curarum solatium in cauda canina quælivisse, porro saluti Canis medicum præfecisse, quem multo rectius hominum Saluti adhibuisset: ac tandem canem sepulchro honorasse. Quæ sane non minor erat levitas, quam cum pulchritudinis suæ admirator, in Pontificem lectus, Formosus appellari summo opere gestiret. De Sacerdote quantum a canum & venationis studio abesse debeat. nuper eruditus Gallia JureConsultus Michael du Perray explicuit libro Gallico de statu & capacitate Ecclesiasticorum hominum ad obtinenda Beneficia L.V. c.2. p. 459.

XXIX.

Ex his igitur constat, Veteres omnem Ecclesiæ aditum canibus præclusisse: restat, ut paucis videamus, qua ratione, si qua irrepserint, eos inde profligarint. Mirabilem sane modum in Homilia Cæsarii Arelatensis, X. quæ & ipsa Augustino adscribitur, ideoque ab Editoribus Benedictinis in Appendicem Tom. V. num CCCXIII refertur deprehendimus: Vult enim Cæsarius, Dominum vel possessorem Canis ideo flagris cædi. *Hoc, ait, considera, si in templo Dei de lignis & lapidibus factò, quisque porcos vel canes introducat, aut lutum mittat, aut stercora spargat, ut illum, per quem ista negligentia facta est, flagellari velimus.* Sunt sane ista Cæsarii verba aliquantisper ambigua, ut non satis certo affirmari queat, an populi clamor, hominem canem adducentem, ad flagra poposcerit, an vero illa flagellatio ex Canonum aut Episcoporum decreto fuerit facta. Posterius tamen nobis verosimilius videtur, præsertim quum Cæsarius multis Præsulum conventibus adfuerit, atque eodem seculo tale quidpiam de Canibus apud Græcos fuerit statutum. Quod si verum fateri velimus, mos ille quidem nobis præstantissimus videtur, modo enim bis terve ejusmodi exempla statuerentur, illive qui non alios sodales nisi Canes secum adducunt, probe fustigarentur, spes sane foret, omnes brevi Canes nulla adhibita sacrorum Lorariorum opera, sic enim *κυνόμαστυες* appellare placet, e templo exulatueros. Sed expeditiorem viam in nonnullorum Sanctorum vitis deprehendimus.

Fuere qui solo Crucis signo omnes a se procul Canes ablegari posse crederent. Quod in vita S. Coëmgeni, Abbatis Glindlacenſis in Hibernia, quam ex MS. Hugonis Wardæi Historiographi Sanctoum ediderunt, legitur. T. 1. Junii p. 310. *Ecce canes ferocissimi & horribiles occurrerant ei volentes eum comedere: sed signans S. Coëmgenus contra impetum canum ipsi mitissimi effecti diffugerunt.* Verum ut taceam ista Coëmgeni acta admodum esse suspecta vel ipsis eorundem auctoribus id confitentibus: præterea quoq; notum sit, pleraq; per signum crucis patrata miracula præsertim recentiorum temporum non minus esse conficta atque illa fabula, qua præeunte crucis signo insignem victoriam Constantinus obtinuisse dicitur: ubi victoriam quidem veram, Crucis apparitionem falsam esse Cornelius Tollius Præfatione Gallica ad Longinum *περί υψους* argumentis non contemnendis probat: unde si quæ tempestates per ipsam averſæ, incendia extincta, urſi, lupiq; fugati, ferociores equi domiti, aut alia leguntur, ea heroicam omnino fidem sibi requirant; Nobis tamen satius videretur canes non crucis signo, sed baculis decussatim impactis abigi, quod sane multo validius ad imperandam fugam futurum, quam si centies crux ostentaretur. Cæterum multa passim observantur de magica quadam animantium tædiosorum profligatione, quam primis Christianis non admodum insolentem fuisse, Constantini M. exemplum docet, qui, postquam Apollonius Thyaneus, multo quidem hoc Imperatore vetustior, ejusmodi statuas averruncatrices in urbe adhuc Byzantina in usum posteritatis disposuisset, illas non solum non dejecit, sed insigni cura servavit, donec a Basilio Macedone everterentur. Testis Codinus de Originibus Urbis Cap. LXIII. LXXVII. in primis Cap CXXIX. asserens, *areum culicem & muscam & alia insecta supra occidentalem arcum Tauri fuisse disposita, quæ quamdiu permanserint integra, nec muscas, nec pulices nec culices urbem intrasse, quoad tandem a Basilio Macedone ex omni arceas deicerentur.* Ubi notes, Codinum his verbis a Latino Interprete omissis suam de his statuis apotelesmaticis sententiam tulisse, earumque usum non admodum obscure approbasse.

Mirum est a majoribus, adversus canes Ecclesiam intrantes, diras & execrationes non fuisse adhibitas, quas admodum olim fuisse solennes Felix Malleolus tractatu de exorcismis dudum asseruit, & Patrum ætate Martinus Del Rio in Disquisitionibus Magicis defendit. Harum quippe execrationum ope Episcopi Lausanenses anguillas & sangvisugas e Lacu Lemano abegerunt, quin imo etiam Bruchos agrorum deprædatores iteratis vicibus citatos, tandem ex omni ditione sua Interprete Bernhardo Schmidio ejecerunt, cujus festivam ad Bruchos Parænesin e Theobaldo Schillingio Stetlerus refert, nosque delectationis gratia inserimus:

Du unvernünftige unvollkommene Creatur, mit Nahmen Inger, und nenne dich darum unvollkommen, denn deine Geschlechter ist nicht geseyn in der Arche Noâ, in der Zeit der Vergiftung und Plage des Wassergusses. Nun hast du mit deinem Anhang grossen Schaden gethan im Erdreich, und auff dem Erdreich einen grossen Abbruch zeitlicher Nahrung der Menschen und unvernünftigen Thieren. Und von daß nun, sämtliches und dergleichen, durch euch und euren Anhang nicht mehr beschehe, so hat mir mein gnädiger Herr und Bischoff Joann gebothen, euch in seinem Nahmen zu ermahnen, zu weichen und abzustehen: Und also von seiner Gnaden Gebote wegen, und auch in seinem Nahmen, als ob stehet, und bey Krafft der heiligen und hochgelobten Dreyfaltigkeit, und durch Krafft und verdienen des Menschlichen Geschlechts Erlösers unsers Behalters JESU Christi, und bey Krafft und Gehorsamkeit der heiligen Kirchen, gebiete und ermahne ich euch in Sechs der nächsten Tagen zu weichen, alle und jegliche besonders, aus allen Matten, Aeckern, Gärten, Feldern, Weiden, Bäumen, Kräutern, und von allen Orten denen wachsenden und entspringenden Nahrung der Menschen und der Thieren, an die Ort und Stätte euch fügend, daß ihr mit eurem Anhang nimmer keinen Schaden vollbringen mögen, an den Früchten und Nahrungen der Menschen und Thieren, heimlich noch öffentlich. Wäre aber Sach, daß ihr dieser Ermahnung und Gebot nicht nachgiengen, oder nachfolgeten, und meyneten Ursach zu haben, das nicht zu erfüllen, so ermahne ich euch als vor, und lade und citire euch bey Krafft und Gehorsamkeit der heiligen Kirche am 6. Tage nach dieser Execution, so

es

es 1. schlägt, nach Mittag gen Wifflisburg, euch zu verantworten, oder durch euren Fürsprecher Antwort zu geben vor meinem gnädigen Herrn von Losann, oder seinem Vicario und Stadthalter, und wird darauff mein gnädiger Herr von Losann oder sein Stadthalter nach Ordnung der Rechten wider euch, mit Verfluchung und Beschwerung handeln, als sich denn in solchen gebühret nach Form und Gestalt des Rechten. Lieben Kind, ich begehre von euch zu beten mit Andacht auff euren Knien 3. Pater noster und Ave Maria der hohen heiligen Dreyfaltigkeit zu Lob und Ehr, anzurufen, und zu bitten, ihre Gnade und Hülffe zu senden, damit die Inger vertrieben werden. Stetlerus L. VI. p. 218.

XXXI.

Poterant ista nonnullis placere, nec tamen omnibus: unde vix ullum deprehendimus exemplum, flagellationem a Cæsario laudatam in aliquo fuisse peractam, quum etiam inscio & invito hominicanis adhærere posset: nec istam sanctissimam Crucem contra quempiam Canem prolatam, nec magicas artes exertas legimus. Itaque restat, eos, consveta hominum opera, nempe minis & verberibus fuisse protrusos, vel in Ecclesia quosdam constitutos, qui destinato consilio latrantes illas umbras propellerent, ac prourbarent.

Quod si quæramus, quibusnam januarum sacrarum cura fuerit commissa, S. Maximus equidem in Cap. V. Dionysii Areopagitæ notat, Diaconos primis Ecclesiæ temporibus eas custodiisse, cui Pachymeres suffragatur. Ecquis vero putet Diaconos majori Ordini semper accensos tam vile officium *Canis propellendi* subiisse? præsertim quum Christiani fideles primorum seculorum, ipsam hanc curam gesserint, quo minus quidpiam profani ad sacras ædes adduceretur. Paulo autem post, quum major majestatis moles ordini Hierarchico circumjiceretur, & varii ministrantium ordines constituerentur: tum quidem de certis ostiariis legimus minori Ordini adscriptis, & ad viliora obsequia destinatis, quibus dedecorum non erat, canum aures vellicare, injectaque Vite, cruentum discessus signum dare.

XXXII.

Neque tamen diffiteri possum, me inter omnes ceremonias, quæ
in

in ordinatione Ostiariorum in variis iisque antiquissimis libris Pontificalibus reperiuntur, nihil de mandata Canum profligatione ostiariis imposita deprehendisse, quum solum ostium Ecclesiæ ipsis tradatur, facultasque introducendi justos, & rejiciendi indignos, Claves etiam ostendantur: Cymbala & Campanæ, una cum eorundem funibus manibus eorum inferantur, assidua horarum observatio iungatur, alto ubique de Cane silentio, nisi quis dicat, Canes sub Indignorum rejectione comprehensos. vid. Libr. Pontif. Salisburg. Mogunt. Turon. ap. Marten. de Antiqu. Eccl. Rit. T. 2.

XXXIII.

Nostra ætas nostrarumque Ecclesiarum *ευταξία* viros quosdam, alias egenos, stipendioque sufficienti conductos constituit, qui pila sua in Canes vibrent, qui tamen sæpe segnes, deque officio suo quodammodo erubescences, suas non admodum bene partes peragunt. Ex quo fit, ut Canes, præsertim quum templum non nimis plenum fuerit, turbas agant, foedos exercent ludos, homines etiam sacras actiones peragentes, & ob venerationem pene immobiles, matronarum quoque & virginum vestes & sarmata foedo liquore conspergant: dum interea isti Lorarii de viatico, ab exeuntibus extorquendo, cogitant, quos ab injuria canum tueri debebant.

Alibi vidi limina templorum impressis fossis excavata, cratesque ferreas impositas, inani commento, quum fossæ cito admodum sordibus repleantur, Canes autem plusquam Romulea impudentia crates illas transiliant, hominumque ingeniis illudant.

Non displicuit mos in Metropoli Bohemarum receptus, ubi ante unamquamque Ecclesiæ januam duæ Vetulæ, e stipe sacra viventes, virgis armatæ assident, Canibusque fustigationem minantur. Quod sane Amazonibus illis, quæ juxta oraculum canem e fornace elicere non possunt, neque difficile, nec dedecorum: quin imo meliorem hac expeditione operam Ecclesiæ præstant, quam, si somnolentæ & desides intra Templi ambitum commorentur.